



DR Mary (tengah) ketika melancarkan SUKIPT di UKM, semalam.

## India sertai SUKIPT buat julung kali

**Jumiati Rosly**

jumiati@bh.com.my

**Bangi:** Buat julung kalinya, India akan menyertai Sukan Institusi Pendidikan Tinggi (SUKIPT) di Universiti Kebangsaan Malaysia (UKM) pada 2 hingga 10 Februari tahun depan.

Selain India yang akan menyertai acara kriket, negara lain yang turut serta temasya yang memasuki edisi keempat ini adalah Thailand, Singapura dan Indonesia serta tuan rumah, Malaysia.

Timbalan Menteri Pendidikan Tinggi, Datuk Dr Mary Yap Kain Ching berkata penyertaan pasukan jemputan dari ASEAN dan India itu mampu meningkatkan lagi tahap persaingan atlet yang bertanding serta menjadikan SUKIPT lebih kompetitif.

Katanya, kementerian berharap penganjuran kali ini akan memberi impak menyeluruh kepada perkembangan sukan di institusi pengajian tinggi negara ini selain melahirkan lebih ramai wira sukan negara.

“Penyertaan IPT antara-

bangsa ini menunjukkan Kementerian Pendidikan Tinggi serius untuk menjadikan kejohanan ini sebagai kejohanan terbesar dan bertaraf tinggi di negara ini setanding Sukan Malaysia (SUKMA) dan sebagainya,” katanya ketika melancarkan temasya itu di UKM, semalam.

Sebanyak 92 kontinjen akan bertanding pada temasya SUKIPT 2018 dengan membabitkan penyertaan seramai 6,344 atlet. Mereka akan bertanding dalam 27 jenis sukan di 29 lokasi pertandingan.